

ZEFFIRINO (CEFERINO) NAMUNCURÁ



DATA no FATIN MORIS: 26 Agustu 1886, iha Chimpay, Patagonia

AMAN: Manuel Namuncurá, Liurai boot (Cacico) no ikus Mapuches nian (uma-ka'in forte liu iha pampa). Xefe matenek, haka'as an atu defende nia povu nia direitu. Hafunu kontra español sira no lakon, maibé padre salesianu, Dom Milanésio, sai mediatór atu indios sira bele hetan kondisaun di'ak rende nian.

INAN: Rosaria Burgos, husi Cile, atan no fen ida entre barak ne'ebé Liurai iha.

DATA BATIZMU: Natál 1888, husi padre Domenico Milanésio, sdb

1897

Nia aman haruka nia ba Eskola Governu nian «El Tigre» iha Buenos Aires, tanba nia hein katak Zefirino bele estuda hanesan malae sira, ba hasoru domindór sira no defende nia povu nia direitu. Maibé Zeferino hetan susar boot iha Eskola ida ne'ebá, nune'e, tuir ex-Presidente Republika Argentina nian, sr. Luis Sáenz Peña, nia aman hatama nia iha Koleju Salesianu "Pio IX". Husi momentu ne'ebé nia tama Koleju, hatudu kedas interese boot ba Evanjellu.

1901

Zeffirino hasoru mons. Cagliero ne'ebé tulun nia atu prepara an ho empenü boot ba Primeira Komuñau no Krizma. Sakramentu rua ne'e marka ninia moris tomak: husi momentu ida ne'e nia haka'as an atu tuir Missa lora-lora. Nia hatudu amizade forte no simples ba Jezús, no haka'as an atu muda ninia karakter tuir eziénsia Evanjellu nian.

Iha despedida ba mons. Cagliero, Zeffirino hateten: "Lora ida ha'u sei sai salesianu no, hamutuk ho mons. Cagliero, ha'u sei ba hasoru ha'u-nia maun-alin sira atu hanorin ba sira dalan ba Lalehan, hanesan ema hanorin mai ha'u".

1902

Zeffirino hatudu sinál ruma moras nian: doutor halo diagnose kona-ba tuberculosis, nune'e mons. Cagliero hanoin atu haruka nia iha Viedma, besik ninia rai, tanba karik ninia ambiente bele tulun nia atu hetan isin di'ak. Iha momentu ida ne'ebá, Artemide Zatti mós moras, no sira na'in rua tuir tratamentu hanesan.

1904

Maski Zeffirino tuir didi'ak tratamentu, nia moras ba oin nafatin, nune'e mons. Cagliero hanoin atu lori nia ba Italia. To'o Torino nia ba hasoru Reitor Mor, p. Miguel Rua no gosta reza kle'ur iha Basilica Maria Auxiliadora nian. Ema barak buka nia atu bele hatene "Liurai nia oan Patagonia nian". Fulan setembru mons. Cagliero lori nia ba Roma iha ne'ebé nia bele hasoru Amo Pio X iha enkontru pesoál.

Iha fulan Novembru, Zeffirino ba hela iha "Villa Sora", salesianu sira nia koleju iha Frascati, fatin fresku ho klima di'ak. Iha ne'e nia kontinua nia estudu, no hatudu ninia espíritu orasaun nian, ninia domin ba Eukaristia, ninia laran maus no ninia hahalok transparente. Maibé nia saúde hetók aat, nune'e nia la bele kontinua tuir lisaun.

1905

Iha fulan marsu, salesianu sira lori Zeffirino ba Roma atu baixa iha ospítal. Durante fulan 2 nia laran, doutor sira haka'as an atu kura nia, maibé lora 11 fulan Maiu, nia mate. Doutor sira no ema moras sira rekoñese ninia laran di'ak, laran moos, pasiénsia no ksolok. Nia rate iha Verano, hamutuk ho kiak sira to'o 1924.

1924

Salesianu sira lori nia isin mate ba iha nia rai, hodi tau iha Santuariu Fortin Mercedes nian. Ema barak halo peregrinasaun to'o Santuariu ida ne'e, liuliu sira ne'ebé halo parte uma-ka'in Mapuche nian, no sira rekoñese ninia santidade.

2007

11 novembru: Card. Bertone foti nia nu'udar Beatu; iha S. Ignazio di Junín de los Andes povu prepara santuariu foun ida ho forma *Cultrùn* (tambor mapuche ba serimonia) iha ne'ebé tau ninia relíquia

Akontesimentu husi ninia moris



Bainhira Zeffirino nia tinan 11 no nia haree nia povu nia situasaun, nia hateten ba nia aman: “Apa, ita la bele kontinua hanesan ne’e. Ha’u hakarak estuda atu bele tulun ha’u-nia emar sira.



Foufoun Zeffirino nia karakter forte liu no nia halo esforsu maka’as atu bele sai ema laran maus no di’ak. Bainhira nia foin tama koleju, lora ida nia halimar “bandera” ho kolega ida, nia book nia kolega ne’ebé, loloos tenke para. Maibé sira hotu hakarak manán, nia kolega kontinua halai no dehan katak Zeffirino la ka’er nia. Zeffirino protesta, nia kolega dehan katak nia mak bosokten ida, Zeffirino bolu nia malkriadu no sira hakbesik malu atu baku malu. Iha momentu ida ne’ebá asistente tama no haketak sira na’in rua.



Bainhira nia aspirante ona iha Viedma, Zeffirino sei halai daudaun ho kuda ida, bainhira Francesco de Salvo husu ba nia: “Zeffirino, saida mak ó gosta liu?” hodi hein katak nia sei temi buat ruma kona-ba kuda sira tanba Mapuche sira matenek liu ho kuda, maibé Zeffirino hatán:

“Sai amlulik!” no kontinua halai.



Bainhira nia moras hamutuk ho Artemide Zatti, dader-dader tuir amlulik no “doutor” Garrone, sira na’in rua tenke han bifi ida, tua kopu ida no paun baluk ida atu bele hetan lalais isin di’ak. Tan ne’e Zeffirino dehan dala barak ba Artemide: “Ita-nia superior sira mak di’ak liu, sira hadomi ita hanesan aman no inan ida. Ita reza tersu ida ba sira”.



Husi Reitor Mor, padre Pasqual Chavez Villanueva, nia omelia

Ohin ita hakarak la’ós de’it hanoin fali ba Zeffirino, maibé aprende husi nia hodi hafoun ita-nia empeñu ba ohin lora no ba aban bairua. Foin-sa’e ida ne’e, moris nu’udar santu, mate nu’udar santu, Amo papa Paolo VI foti nia nu’udar Veneravel, Amo Papa Bento XVI foti nia nu’udar Beatu no povu Arjentinu no povu kontinente Amerikanu tomak iha domin no devosaun boot ba nia (sira dehan: “Maromak iha lalehan, Zeffirino iha rai”).

Nia la espresa de’it ninia an rasik, nia la hatudu de’it ninia haka’as an aswuain nian atu moris tuir virtude. Nia mai husi família forte no laran luak husi uma-ka’in Araucani nian, iha rai Patagonia. Santidade bele buras iha nia, tanba hetan rai bokur iha kualidade umanu sira ne’eb’e nia simu husi nia rai no husi bei-ala sira, kualidade sira ne’ebé nia lori to’o perfeitu.

Iha Zeffirino ita bele lee ninia povu nia istória tomak. Iha nia ita hetan nia povu nia terus, nia preokupasaun, nia deseju sira; no iha tempu adolexénsia nian, buat ne’e hasoru malu ho Evanjellu no fiar. Tan ne’e nia bele dehan fraze: “Ha’u hakarak estuda atu bele tulun ha’u-nia povu”. Zeffirino rai mehi boot ida iha ninia fuan: estuda, sai amlulik no fila fali ba ninia povu atu fó kontribusaun ba sira nia dezvoltamentu kultural no espirituál, hanesan misionariu salesianu dahuluk nian halo. Nia hakarak Evanjellu “hola isin” iha nia, atu nia bele halo Evanjellu tama iha ninia povu nia istória no tradisaun sira.

Sira ne’ebé hanoin katak fiar halo sarani sira halai husi empeñu, sira ne’e sala, tanba fiar mak kbiit transformasaun istória nian. Santidade ... hatudu umanidade ida ne’ebé realizada. Santu mak ema ida ne’ebé loos no kontente. Sasin sira ne’ebé moris hamutuk ho Zeffirino ko’alia kona-ba ninia laran di’ak no oinsá nia foti empeñu sira ho seriu. Kolega sira dehan katak “Nia hamnasa midar ho ninia matan sira”: nia mak adolexente ne’ebé hotu-hotu estima, sai modelu no santo.

ATU HATENE ZEFFIRINO DI’AK LIU TAN

- ➔ “Misioni Don Bosco” grava DVD ida ho título “Zeffirino, Santo e nostro” ho lian oinoin, iha ne’ebé ko’alia kona-ba Zeffirino nia beatifikasaun.
- ➔ Iha folder ida ne’e bele hetan mós PPT kona-ba Zeffirino nia moris ho ninia foto sira
- ➔ Iha YouTube bele hetan buat ruma hodi hakerek Cefirino, maibé hotu-hotu ko’alia español.



Ha’u gosta saida iha Zeffirino nia moris? Nu’udar Timor oan, ha’u bele banati tuir nia iha aspetu ida ne’ebé?